

四庫全書

集部

欽定四庫全書

宋元詩會卷八十九

兵部主事陳焯編

陳樵

字君采婺之東陽人別號鹿皮子世為浙東巨族其父名取青宋末進士嘗抗章詆賈似道誤國及宋亡元丞相已延見其章欲用之辭不就樵幼承家學又受易詩書春秋大義於李直方凡古今之書無不讀讀無不解學成而隱邈然不與世接著書數十種而易象數新說洪範傳經解左經新說太極圖通書解聖賢大意性理大明石室新語淳熙糾繆尤見稱於學者卒年八十有八為至正乙

己年詳見宋景
濂所撰墓誌

清隱亭

白日照陽春九陌揚遠塵往來酣蟻戰誰是投閒人
生苟知足政復貴隱淪萬事等大夢汨沒徒艱辛所以
賢達士不肯勞其神結亭林泉間歸來養清真窓虛野
鳥狎樹密山猿馴草色上階秀花枝倚檻新俛仰有佳
趣樽酒時相親終焉遠塵俗不愧無懷民

送吉夫北上

之子冰雪姿冥心學仙真官卑且勿念況復憂其貧邇
來太白山山勢凌秋旻雲盡月照夜花開鳥鳴晨閒居
少公事猿鶴為比隣採芝過林麓釣魚游水濱七年不
得調幽興如逸民通塞任物理聊用安此身憶昔始相
識交情日以親問君煉藥方祕之不肯陳金液且莫採
何以製水銀豈伊蓬萊中無分追後塵君今別我去九
關朝帝宸功名信可就慎勿煩精神閭風青莪我海波
白粼粼他年重會面笑盼桃華春

答李齊賢言別

古來青雲士論德不論年及時揚意氣車服耀且鮮譬
彼桃李花逢春各爭妍胡能學蘭菊遲暮秋風前羨子
當年華文思如湧泉詞場早騰譽海內推英賢而我竟
何為著鞭苦不先賦命有遲速行止任自然吾觀鴻鵠
飛低迴未須憐會當振六翮高舉摩青天

歲寒亭

夕隕悲薜華秋零悼蒲柳急景不可留高風邈難久風

霜十二月松竹凋獨後還與嶺上梅結為歲寒友草木
本無情猶能同歲寒奈何市井交輕薄不足觀

把酒

把酒勸白日日車邈難攀朝來出東海薄暮沈西山東
西若循環來去無時閒何如延光景令人駐朱顏

送兄游姑蘇

浮雲渺天末隨風恣悠揚遊子四方志去去道路長手
中二尺琴朱絃汎宮商但恐和者寡使我心增傷

晚香逕

秋菊有佳色幽香知為誰
蔚為霜中傑肯向露下哀
獨賞心悠然酒至觴淋漓
永懷陶靖節高風邈難追

東飛伯勞西飛燕題飛花亭

東飛伯勞西飛燕花光絮影從風轉
蜂黃蝶粉照靈葩不散明珠祇散花
霑衣墮袂花如雨羽人化蝶隨花去
羽人下顧笑春紅春闈一夕生秋容
骨齊熊耳君知否花艷春暉不經久
羽衣一瞬千萬春
薦花墮蕊齊崑崙

夜闌曲

碧宇星回夜漫漫
靈蕪煙暖重熏薦
冷翠香銷青桂枝
冰荷蓋光光遠
惟纖腰艷舞金菱
粧只羹蜀酒精瓊
磨酒闌半解龍綃
衣春朝曲渚聞鷓
鴒雞

海人謠

海南蠻丁髮垂耳
朝朝采寶丹崖裏
夜光盈尺出飛魚
栢葉收珠寒蕊起
幽箔連錢生綠花
切玉蠻刀如切水
九譯來朝萬里天
北風不動明玕死

行路難

褰帷取流蘇流蘇不解連環解離情別思出君懷教人
枉結流蘇帶作書報天孫河翻浪動七香輶折伊蘭兮
捐艾蕭伊蘭化作榛中草美盼何須比目魚六翮安用
頻伽鳥文鴛宛頸柰枝連不如見月生羽翰

七夕宮詞

內人拜月金鋪戶鳳宿梧枝秋葉舞露華入袂玉階寒
織署錦工催祭杼月下金鈿照骨明同心絲繪紅生縷

素瓜碧寶上華樓夜闌飈馭下銀州

送厲生之天台

劉郎洞前藥草肥年年送春春不歸劉郎採藥路不迷
路迷却是還家時人間藥盡採者稀醫師採藥歸來遲
終南捷徑莫西去正在劉郎路迷處

代嘲舊人

吳王臺前天地老羊家吹笛煙花繞羊郎到老不識顰
昨日西施顰更好妾行自縮春風髻姊送出門車在道

塗金兩袖石麒麟姊唾乾時碧如草唾花一夜滿妾身
云是背後淖夫人

代玉山子答

建中老父吹蘆管背花吹盡風花片雪中花老花未知
我起開簾納江燕夏姬引鏡春爭妍房老不出金谷園
花奴鼓急人人顧研光帽滑花難住

題海棠

東風吹墮絳雲影別院春遲宮漏永繡幃寶帶綰流蘇

夢入瑤臺呼不醒
熒熒銀燭花蕊多
城頭烏啼奈曉何
題騎牛讀書圖

朝看書騎牛出去
日上初暮看書騎
牛歸來日欲晡
朝朝暮暮看書卷
還慮牛飢無牧芻
家貧本分辛勤過
平時敢望閑工夫
人生衣食皆有餘
棄之不學將何如

中秋月

銀漢西流烏接翼
回首人間化為碧
瑤臺貝闕可避居
三郎錯路歸魚鳧
霓裳月裏親偷得
却怪李謩偷壓笛

投外憲列職

浙右饒名宦天潢異衆流星華婺女分印蘄越城秋長
吏多佳政流人反故丘諸郎復為郡外憲此優游

銀谷澗山房

樓臺依水石石樹帶疎篁洞口有靈藥水西無夕陽天
花空處沒春草定中長芳桂已飛盡有時聞妙香

次周剛善僧房牡丹韻

不擬維摩室春風步障開欲分清露浥故近白雲栽色

奪人間艷香從天上來韶華正繁富啼鳩莫相催

春日 二首

處處春風滿東皇信不偏
靡蕪窮遠岬梅柳共新年
白水暖浮日碧山晴吐煙
清時多樂事敢擬卜居篇

細雨花陰重輕煙草色勻
驚禽長避客嬌燕却依人
絃管紅樓酒輪蹄紫陌塵
東風競游賞因想杏園春

送張仲舉歸晉陽舉進士

挂帆謝公浦把酒臨閭城
江柳不忍折春風當別行
關

雲連楚暗隴月向吳生葉落長安道思君北問程

黃晉卿見過却歸烏傷

江雨間行人江干雨又新今朝下垂榻幾日望行塵冰
雪鶯遷樹江湖雁得春非君被軒鑒懷抱欲何伸

太霞洞

石林深處飯胡麻幾度登臨送日車雪到峰頭猶是雨
雲生石上半成霞相看露下朝華草不放春歸冷艷花
魏紫姚黃風捲盡人間蜂蝶到山家

越觀

吳根越角兩茫茫石傘峰頭俯大荒
鳥道北來通禹會雁程南去盡衡陽
雲移暫覺天河沒月暗不知松影長
天姥若耶他日事明朝采蕺下山梁

溪亭

百尺層崖接翠微潭空石影曉離離
雲隨白鶴翔千仞月與青猿共一枝
不信水深騎赤鯉曾因夢裏殺黃鸝
芳洲翠羽無人拾自補山中白接羅

翻經臺

石函朱几曙雲中雲散臺高萬象空枝重有時來白鳥
雨殘無處著晴虹血書貝葉三年碧秋入羅衣半袂紅
幾度山人同聽法翠微深處石池龍

少霞洞山居

二首

輕霞洞口採金芝千歲山南聽竹雞煮石鼎中饒綠薤
封書燕外有丹泥度關僧寄婆羅樹入寺人傳木客詩
又抱瑤琴向陰壑青禽啄碎碧梧枝

木客詩見
江西圖經

煙霧霏霏溼麝煤
文生綠硯硯生苔
天風拂地鳳笙下
楚雨入吳龍女回
石壁水花泉湧出
海棠春色鳥銜來
洞天只在風塵裏
門外游塵埽不開

招隱巖

何年積蓋與山齊
樹轉峰回草徑微
野火裂為方解石
秋風不到寄生枝
誰來樹下看雲坐
半入人間作燕飛
箬笠巖前今淨社
寧須更草北山移

紫微巖

手種巖花對北峰
花間無葉紫茸茸
人行鳬雁不到處
家在鶯花第幾重
綠水值陰還又碧
青春著樹却成紅
紫霞漫入絲綸閣
且伴山中白髮翁

飛花亭

昨日朝華照夕曛
我看夕秀比朝茵
松高猿見古時月
花晚鶯添幾日春
盛露囊中封臘藥
無塵袖裏裹吳雲
人間何用春長在
只愛飛紅日日新

水亭

小鳳穿花照水明
水禽衝浪動軒楹
雲從薜荔衣中起
雨向玕琪樹上生
曲水傍人流白羽
嬌花無語答黃鶯
澗中日與山中日
同上晴窓各自行

南軒

澗底菖蒲綠滿叢
雲根水竹傍梧桐
人來遠地見山碧
月未冷時如日紅
春水有聲通北澗
晚花無信誤東風
人間不是高寒地
那得芳菲入夏中

臨花亭

芳草生煙葯在房
鞋紅衣紫共芬芳
丘園風雨三家市
草木文章萬丈光
花正欲言還寂默
春無自性不堅良
晚來只有鵝紅在
莫放香絲取次黃

西峴峰

聽盡熙寧水樂聲
斷碑無字倚荒庭
雲歸僧舍樹皆濕
犬吠獵園山誤謦
覆屋松陰遮日黑
隔林春色著雲青
故侯轍迹無尋處
丞相題詩擬峴亭

上虞魏氏湖上精舍圖

湖上蘭舟水上亭有時水漲與塔平
亭前古樹經春發
門外孤洲昨夜生海氣遙連育王塔
蜃樓斜入會稽城
山陰道士攜琴至寫盡風聲到水聲

霜巖石室

洞天無暑亦無寒
淑氣芳風不出山
掃葉僧歸雲未濕
賣花人去蝶先還
滿庭脩竹下黃葉
千歲古松生綠煙
盡道雪中依裸壤
虛疑夏室是冰天

石磴

磴平如席草茸香盛夏宜人石氣涼杜宇血銷添碧燐
山雞食罷化餘糧赤松有約吾將老白髮無愁不解長
醉則漱流眠枕此看雲不復據胡牀

菊庵

秋深紅紫滿秋籬穠蒂纖莖綠照扉猿飲澗中甘菊水
雲粘石上舊蓑衣月知人境來相覓花有心情死不飛
桃李自開還自落却疑晚卉未忘機

山房

冷雲堆裏散人家鹿幘羊裘不衣麻門外樹身無歲月
山中人語帶煙霞雲侵壞衲長生菌風斷游絲半度花
采叢林深人不見連筒引水自煎茶

麋谷澗

清流拂石下巖隈澗底菖蒲曳綠苔野鹿避人縣樹宿
溪魚乘水上山來翠連春草誰能拾風觸石崖彊半迴
自入夏來涼意定更移脩竹澗邊栽

伏蟾山

山上飛雲去不留山中蟾兔又經秋斗臨河曲侵鵲尾
露上莎根到草頭綠桂花中歌白亭碧梧影裏飯青牛
有時竹掃蟾蜍下滿腹丹書溼欲流

山館

石甌峰前綠草肥兔絲挾雨上梧枝天台道士投龍去
少白山人相鶴歸首蓂帶茸初映日雕胡落釜半成糜
石楠花落無人掃誰臥水陰歌采薇

春日閨思

白玉堂前雙燕飛
堂中思婦怨殘暉
臂環寄遠青蕪合
瓊字題乾白雁歸
醉倚合昏驚葉暗
愁尋豈寇妬花肥
窓間昨日同心錦
染罷香絲不上機

園

築園却欲留方士
一室園中度歲年
有客持雲坐盤石
無人伴月出蘿煙
晴晞白髮三千丈
寒折朱絲五十絃
玄圃方壺君莫問
人間回首即神仙

玉雪亭 二首

花遠亭臺水遠門壺中別是一乾坤銀蟾飛去秋無色
白石長來雲有根樹印虬枝翻畫譜僧調懶髓補詩痕
相如健筆誰堪繼好騁詞華賦兔園

羽仙飛步駕青鸞仙袂臨風響佩環琪樹移根來月裏
瓊花無夢落人間春回隴首梅先覺舟入山陰客未還
我亦玉堂揮翰手他年鴈鷺造朝班

送蔡竹澗江山教諭

仙霞嶺與落霞齊乘興吟游日未西簾影到池元是水

穀紋浮雨却成溪
煙清院竹鸞窺客
日暖宮芹燕拾泥
莫道廣文官況冷
窓前生意草萋萋

咏蘆雁宿

沙汀栖處穩
夜漏有奴看
月暗蘆花白
一身秋夢寒

山水

青山如髻樹如麻
茅屋青帘認酒家
侵曉一番飛雨過
滿川流出碧桃花

李孝光

字季和溫州樂清人少博學雅志復古隱居雁蕩峰下四方之士遠來受學名曰益著台哈布哈以師事之至正七年詔徵隱士用秘書監著作郎召赴京師見上於宣文閣進孝經上大悅賜上尊明年陞秘書監丞卒于官年五十三有文集二十卷

大星

大星在天小星落城頭
嗚嗚吹畫角津吏擊鼓河上船
行人草草居人憐男兒墮地孤矢願南北東西君莫怨

北風寄陳輔賢

別本少前五句

蕭蕭北風吹客船
月未出海天蒼然客子放歌脚扣舷

蕭臺東頭天裏海蕭臺西頭山刺天君行西過釣臺口
寄謝江邊老病叟坐看雲臺落人手丈夫豈敢愛微軀
奈此黃花一尊酒

茅山謠

道人兩鬢青如蓮大醉上山捫青天青天蕩蕩玉盤出
引手舉盤天上縣銀海傾倒桂樹影長風吹香落丹井
地上小兒沾玉馥白兔急搗玄霜熟惜惜仙家十二樓
夜半起拂跋烏浴手招茅君叫列仙帶劍上立紅雲前

茅君騎虎上天去道人乞我明霞篇

送方叔高賦得長安道

灞陵橋上秋風早行人曉出長安道長安城頭烏正啼
長安陌上聞朝雞征車遙遙行復止征馬蕭蕭鳴不已
將軍年少美且都黃金箭鏃雕玉弧未央前殿進書罷
諸生拜官辭石渠將軍歸去亦草草長安道邊人羨好
莫憐賈誼謫長沙不見馮唐禁中老

妾薄命

妾薄命當語誰身年二八為嬌兒阿母歲歲不嫁女二
十三顏色衰天公兩手搏日月下燭萬物無偏私奈
何醜女得好匹一生常在黃金閨美女如花不嫁人父
母既沒諸兄癡寄書東家小姑道得嫁莫擇夫壻好他
人好惡那得知失時不嫁令人老

越上

賀家湖上又秋風放翁宅前東復東兩行雲樹忽遠近
十里荷花能白紅游人濯足銀潢上越女梳頭青鏡中

我欲張帆上南斗扶桑碧海與天通

宿巢縣

旅食荆吳改歲年春風行路思綿綿青山故遠周瑜墓
明月猶窺亞父泉楚縣城荒餘畫角巢湖日落有歸船
天涯芳草萋萋綠漫為登樓憶仲宣

送陳杏林赴潮州醫學教授

三千驛路上灘船九品醫官半百年藥市得錢添月俸
杏林收穀當公田北書漸覺江鴻遠南食初嘗海蛤鮮

不用越巫驅瘴癘家家傳取衛生篇

古長信秋詞

二首

缺月流光入綺疏金壺傳箭夢回初秦臺彩鳳無消息
桂影空閒十二除

輦路青苔雨後深銅魚雙鑰畫沈沈詞臣還有相如在

不得當時買賦金

李五峰擬古樂府與楊廉夫齊名
今集內不傳一字當為拙目妄刪

也

吳王納涼圖

六月長洲水殿涼酒酣揮袖倚新妝芙蓉露冷秋雲薄
回首西風響櫺廊

游艮嶽

一沼何堪役萬民一峰將使九州貧江山假設方成就
真箇江山已屬人

寄朱希顏

江邊鴻雁下年年客子何由兩鬢玄七十二灘秋月白
荻花風落釣魚船

張昱

字光弼廬陵人早遊湖海為廬集張翥所知楊左丞鎮江瀚辟參謀軍府事遭杭省左右司員外郎行樞密院判官天下用兵藩府官多侵官怙勢光弼詩酒自娛超然物表左丞死棄官不出張氏欲禮致不應策其必敗題蕉葉寓意焉居西湖壽安坊今之花市也貧無以庀廬凌彥翀為疏募金繕葺之明初被徵至京閔其老厚賜放歸年八十三卒

白鴝雀歌

烏桓城下白鴝雀雄鳴雌隨求飲啄有時決起天上飛
告訴生來毛羽弱西河伶人火倪赤能以絲聲代禽臆

象牙指撥十三絃宛轉繁音哀且急玉真處子舞進觴
團衫繫帶分兩傍玉纖羅袖拓枝體要與雀聲相頡頏
朝彈暮彈白鴝雀貴人聽之以為樂變化春光指顧間
萬蕊千花動絃索只今蕭條河水邊宮庭毀盡沙依然
傷哉不聞白鴝雀但見落日生寒烟

賦白鴝雀者多矣
覽此可得作歌之

由

歌風臺

世間快意寧有此亭長還鄉作天子沛宮不樂復何為

諸母父兄知舊事酒酣起舞和兒歌眼中盡是漢山河
韓彭受誅黥布戮且喜壯士今無多縱酒極歡留十日
慷慨傷懷淚沾臆萬乘旌旗不自尊魂魄猶為故鄉惜
由來極樂易生哀泗水東流不再回萬歲千秋誰不念
古之帝王安在哉莓苔石刻今如許幾度西風灞陵雨
漢家社稷四百年荒臺猶是開基處

陪宴相府得芍藥花有感

醉吐車茵愧不材馬前蝴蝶趁花回玉鉶盛露扶春起

錦帳圍燈照夜開，垂白敢思溱洧贈歌紅。
還是廟廊栽揚州，何遜空才思。惟對高寒詠閭梅。

惆悵 三首

三山夢斷綵雲空，幾把長箋賦惱公。
畫閣小杯鸚鵡綠，玉盤纖手荔枝紅。
春衫汗裊薔薇露，夜帳香回茉莉風。
惆悵近來江海上，却將鞍馬學從戎。

畫船湖上載春行，日日花香扇底生。
蘓小樓前看洗馬，水仙祠畔坐聞鶯。
碧桃紅杏渾相識，紫燕黃蜂俱有情。

惆悵繁華同逝水盡歸江海作潮聲

惆悵當年使酒來娼樓紅粉夜相催可憐明月二分在
不見瑤花半朶開誰復醉翁堂下柳更堪從事閣中梅
揚州一片青青草誰信春來無雁回

湖上漫興

湖上新泥雪漸融門前溝水暗相通
裙欺萱草輕盈綠粉學櫻桃淺淡紅
暮雨欲來銀燭上春寒猶在酒樽空
青綾被薄不成夢又是一番花信風

秋興

一夜涼風便覺秋，楚人多感易生愁。
金盤露水何曾見，紈扇恩情未肯休。
零落梧桐宮井上，稀疏楊柳御街頭。
近來收得麻姑信，說道蓬萊更可憂。

感事

雨逼湖樓作晚寒，此心時暫酒邊寬。
杞人惟恐青天墜，精衛難期碧海乾。
鴻雁信從雲裏過，山河影在月中看。
洛陽橋上聞鶉處，誰識當時獨倚闌。

贈沈生還江州

鄉心正爾怯高樓，況復樓中賦遠遊。
客裏登臨俱是感，人間送別不宜秋。
風前落葉隨車滿，日下浮雲共水流。
知女琵琶亭畔去，白頭司馬憶江州。

演法師惠紙帳

銀燈照夜白紛紛，四面光搖白縠文。
隔枕不聞巫峽雨，繞牀惟走剡溪風。
和柳絮何因到月，與梅花竟莫分。
塞北江南風景別，却思羶帳舊從軍。

幕中呈楊左丞

免胄日趨丞相府解鞍夜宿五侯家
玉盃行酒聽春雨銀燭照天生晚霞
世亂且從軍旅事功成須插御筵花
漢王未可輕韓信尚要生擒李左車

峽川

石與青天近溪雲向客低
自然堪下淚不是有猿啼

水殿納涼圖

別殿紅綃女無風亦自涼
欄邊是湖水夜夜宿鴛鴦

別劉博士

祇為情如雨從教醉似泥免看楊柳色相送出城西

柳花詞

滿院長條散綠陰誰家門戶碧沈沈地衣不許重簾隔
雪白花鋪一寸深

婆留井

錢王初生時將棄井宗婆奮留之故乳名婆留既貴以鏐代留字

舊日婆留井未堙石闌苔蘚上龍鱗而今率土俱臣妾
莫願皇天產異人

題吳綵鸞寓韻圖

小點紅鸞欲下遲
遠山渾似畫來眉
如何一念人間事
上界仙曹便得知

春日

一陣東風一陣寒
芭蕉長過石闌干
只消幾箇懺騰醉

看得春光到牡丹

瞿宗吉云此詩刺
淮張用事諸人也

輦下曲

守內番僧日念呌
御廚酒肉按時供
組鈐扇鼓諸天樂

知在龍宮第幾重

似嫌皎日破愚昏
白晝尋常一釣軒
男女傾城求受戒
法中祕密不能言

劉躍

字宗起其先南唐駙馬之後徙居廬陵其地名中洲故自號中洲釣者躍性警敏讀書過目成誦釣玄撫粹以大肆力于文章徵聘鼎來念祿不逮親概辭之作樓曰海雲延四方之士講學其中樂而忘老詩集若干卷未川吳孟勤題為洲泉集蓋易中洲釣唱以是名美之嘉其學之有本也

園樂為國賓先生賦

君不見金谷平泉恣歡譔異石奇花成海嶽寧知富貴
生百憂一旦荆榛總寥落灘江先生隱者流數畝荒園
即為樂瓜畦新雨長更鉏橘井青天甘自鑿生意隨時
灌野芳餘香暇日收仙藥倦來佳句獨長吟醉裏濁醪
還更酌不讓習家兼有池絕似溫公乍居洛前年丹詔
急賢良高臥白雲辭好爵東鄰公子帶橫金北里老翁
田負郭從渠五鼎厭珍饌自分杯羹飽藜藿世路風波
不暫停柴門烟月應如昨我亦江湖坐釣徒直釣魚恨

多蛟鱷明當抱瓮託幽棲尺書先寄東飛鶴

梅村歌為金溪王用霖賦

王先生有高趣家在梅村最深處清溪一派遶孤村種
得寒梅千萬樹年年凍雪封林園羣木生意俱斬忽
驚一蕊破香玉直與天下春爭先繁花爛熳相高下
彷彿枯梢晴雪亞光涵水樹不勝秋影入瓊林欲無夜
先生巾屨獨行吟看花繞樹窮幽深奚奴不覺錦囊重
發興兼有龍蜃吟笑殺西風明月冷負却暗香與疎影絕

似羅浮仙者流妙處無言心自領

讀書樓為姪以安賦

阿咸新起讀書樓十二欄干五月秋萬卷烟雲香墨潤
一燈風露碧窓幽新題華扁迴鸞鳳高捲朱簾近斗牛
不用金籬遺孫子好傳鴻寶繼前修

和送石維高之泉江

愛君吟思浩無邊眼底交遊最少年開口已誇成玉唾
論心偏得醉金船鳳凰瑞世鳴初日鴻雁排雲上遠天

此別但應勞夢想高標梧竹淨娟娟

沙渚盟鷗

平沙白石渚初晴好共羣鷗訂舊盟斜日荒涼雲影落
清風浩蕩雪衣輕海翁坐對應相狎山客行隨亦不驚
却笑當筵賦鸚鵡踈慵久已謝浮名

良月宴于棲遁處賦殘菊

菊殘猶有最高枝棲遁齋前獨自怡深夜雪霜金瑣碎
清晨風雨玉離披魏公不負題詩好陶令空嫌送酒遲

憐爾秋香渾未減餐英回首更何之

奇石為黃大賦

相對憐孤石由來出四溟一峯支瘦骨千穴見奇形空
洞含天趣巉巖毓地靈鰲移愁負重龍擘帶餘腥巧斲
慚羣匠神鞭謝六丁晴雲時吐白陰蘚間書青花木恢
餘地琴書列廣庭願言題琬琰珍重列圖經

張伯遠

字可久號小山善製詞曲評者謂其清而且麗
而不豔若披仙風招海月當以九方皋之眼相之

餞祝直清

朝餐狙林橡夕飲虎窟泉幽棲豈不逸于道為未全是
以少微星含輝麗中天雲蘿謝招隱冠帶趨興賢魯生
贊制作商老安疑然董子述徵驗賈誼明經權盛德有
遭逢志士無棄捐長貧若忘世一出垂千年折梅楚山
阿賦詩江水邊寂寞思古人中懷為君宣

周密

號草窓以樂府知名其出處籍里弗著惟成廷珪
集中有送周草窓尊師歸廬山太平宮益元末詞

人晚而學道者也然難直定
為黃冠故不附張雨之後

有懷袁季源

江樓深夜倚涼入鬢蕭蕭人隔東西浙心隨早晚潮風
高孤月暈河澹萬星搖欲寄今宵意新鴻或可招

南園

清芳堂下千株桂猶是韓家舊賜園白髮老翁和淚說
百年中見兩平原

吳當

字伯尚澄之孫也當幼承祖訓以穎悟篤實稱長
通經史百家言侍其祖至京補國子生至正五年
以蔭授萬億四庫照磨未上用薦者改國子助教
預修遼金宋三史書成除翰林修撰遷國子博士
歷監丞司業祭酒待制翰林改禮部員外拜監察
御史轉禮部郎中再入翰林為直學士時江南兵
起大臣有薦當才可任政事者特授江西肅政廉
訪使偕江西行省叅政和尼齊兵部尚書黃昭招
捕江西諸郡當召募民兵所至克捷連定建昌撫
州二郡為總兵托多所忌構蜚語謂當與賊通而
和尼齊者雅不善當亦力掩其平賊功狀於是當
與黃昭皆左遷後誣白詔拜當江西行省叅知政
事命未下而陳友諒已陷江西當杜門著書友諒
遣人辟之以臥拒不屈終隱廬陵逾年病卒年六
十五所著有周禮
纂言及學言稿

潯陽舟中

百年頭上著烏紗一日江邊踏釣槎
病似相如空有賦貧于杜甫更無家
漁歌楚楚蒹葭月樵笛村村躑躅花
事業已隨兵燹盡青門惟守邵平瓜



宋元詩會卷八十九

欽定四庫全書

集部

宋元詩會卷九十一

詳校官中書臣陸湘

主事銜臣徐以坤覆勘

總校官知縣臣繆琪

校對官中書臣王鍾泰

謄錄監生臣陳秉寧

欽定四庫全書

宋元詩會卷九十

兵部主事陳焯編

倪瓚

字元鎮無錫人本大家子元季知天下將亂盡散其資材遁吟諷兼寓意畫圖遂稱名于所居有清閬閣雲林堂而清閬尤勝古墨妙彝器悉藏其中晚年避龍來往江湖多寓琳宮梵剎明洪武甲寅年六十八始歸鄉里時已無家寄居鄒氏而卒

春日雲林齋居

池泉春漲溪逕苔夕陰滿諷咏紫霞篇馳情華陽館晴
嵐拂書幌飛花浮茗盃階下松粉黃窗間雲氣暖石梁
蘿薦垂翳翳行踪斷非與世相違冥栖久忘返

玄文館讀書

真館何沈沈寥廓神明居陽庭肅宏敞丹林鬱扶疎
瞻言茲遊息脫屣榮利區檐榱初日麗池臺涼雨餘焚香
破幽窠飲水聊舒徐潛心觀道妙諷咏古人書懷澄神
自怡意愜理無遺誰云黃虞遠泊然天地初迴首撫八

荒紛攘蚍蜉如願從逍遙遊何許崑崙墟

蕭閒道館聽袁南宮彈琴是日風雨蕭然有感而

作

玉琴轉清亮風雨更飄飄疎桐蔭高館朱槿耀芳條生
物曷可遏撫事發長謠弱齡陪清譙櫛髮想垂髫相見
日已老離居夢且遙秋江渺雲水去鶴影搖搖

夜泊芙蓉洲走筆寄鍊師

芙蓉猶滿渚疎桐已殞霜泊舟菰蒲中吳山隱微陽因

懷靜默士竹林閼玄房煮茗汲寒澗燒丹生夜光憶與
鄭郊輩閒詠步脩廊時予有所思顧瞻重徜徉庭下生
苔鮮牖間繙詩章奕勢鄭老勝酒榼郊生將雅歌雜詠
諧列坐飛羽觴子歸日已晚棗栗亦傾筐別本止此揮手輒
謝別暮宿荒城傍遲明趨所期待子鄭公堂晨往遂至
昏企望徒俵俵乃嗟仙真馭固非世所望惻惻理歸櫂
泛泛秋浦長還尋甫里陸夏醉山陰王素冠斯馳贈喜
知終未忘余茲將遠適旅泊猶彷徨微風動虛碧初月

照石梁曠望對清景賦詩託陳郎茯苓思同煮夜雨共
匡牀

和答吳寅夫對雨見懷

溽雲變陰晦零雨隨風濤的皪集蓮池飄飄洒蘭皋朱
絲緩瑤瑟綠錢生寶刀撫事增慨慷端居倦遊遨處世
每慚柳懷人徒咏陶脆質愛靈藥閒情宣弱毫

述懷

讀書衡茅下秋深黃葉多原上見遠山被褐起行歌依

依墟里間農叟荷蓑過華林散清月寒水淡無波遐哉
栖遁情身外豈有他人人生行樂耳富貴將如何

早春對雨寄懷張外史

林外苦泥雨憂來不可絕掀帷望天際春風吹木末飛
蘿散成霧細草綠如髮念子獨高世南山修隱訣撫弄
無絃琴招邀青天月神安形不凋跡高行自潔思之不
可見饑渴何由歇願為鸞鵠翔南遊拂松雪

走筆次陶蓬韻送葉參謀歸金華

手把玉芙蓉青天騎白龍出入人間世飛鴻踏雪踪
瑤草粲可拾羣峰森玉立璧月挂天南離離星斗濕
君昔在山時玉韞山有輝因同白雲出更與白雲歸
白雲無定處詎只山中住河漢共縈紆經天復東注
金華牧羊人遊戲不生嗔笑拂巖前石行看海底塵
手調白羽箭陋彼磨銅硯一語不投機歸歟寧再見
用士始郭隗全趙終相如項王疑亞父竟爾龍為魚
擾擾何時已百年聊寄耳良也報仇歸言從赤松子
去山今幾年還山大

學仙天台司馬宅雲氣近相連

戊寅十二月丹丘柯博士過林下賦詩次韻以答
積雪被長坂卧疴守中林山川雖云阻舟楫肯見尋傾
蓋何必舊相知亦已深驚風飄枯條清池冒重陰聯翩
雙黃鵠飛鳴綠水潯顧望思鬱紆徘徊發悲吟願言齊
羽翮金石固其心歡樂何由替黃髮期滿簪

古詩送友仁賢良之京師

吳山朝靄外闔門春雨餘超忽孤帆遠天末浮雲舒君

今北闕遊我栖南山廬荷鋤事耕作閉戶詠詩書高林
鳴禽曙青苔行迹疎還期茅簷下一柱故人車

贈惟寅

陳汝秩高士

隱几方熟睡故人來扣扉一笑無言說清坐澹忘機衣
上松蘿雨袖中南澗薇知爾山中來山中無是非三十
不娶妻四十不出仕消搖岩岫間翳名以自肆何曾問
理亂豈復陳美刺高懷如漢陰終老無機事

送惟寅

春江煙靄綠
遠樹明清旭
歸雁影斜斜
鳴聲斷復續
陳君挂帆去
似與雁相逐
水際白雲度
山中甘雨足
安得從耦耕
柴門藝松菊
去去且入城
懷抱向誰傾
姚公有古道
希夷多遠情
俾爾遂高隱
狂歌樂幽貞

聽錢文則彈琴

牛鳴野窮中
雞登山木上
黃鍾雜姑洗
春容以清亮
別鵲暮鳴飛
流水春演漾
愛爾絃手忘
令我形神暢
憶昔擅能事
宋袁余所向
錢君生獨後
超軼絕塵鞅
操琴晚

聞道月斧揮天匠杳如清廟瑟朱絃聽歎唱古道久寂
寥古音亦淪喪促軫淚沾纓歌詩重悲悵

為張來儀賦匡山讀書處

廬山鬱岩堯上有香爐峰影落碧天外翠玉琢芙蓉牽
蘿讀書處雲磴無行踪猶遺石巖苔花開紫茸愁心
飛春雪寶劍沈雙龍應化蘇耽鶴歸栖千歲松仙品採
芝叟久別倘相逢

題驪山圖

校獵上林苑洗馬昆明池霜威肅笳鼓雲氣画車旗馬
班陳賦咏衛霍綏蠻夷王風既未遠文明方在茲逶迤
霄漢上鳳凰尚來儀

送馬生

送子淮南行繫舟江岾柳翠影舞晴煙落我盃中酒舉
盃向落日春水浮天碧時見白鷗飛雪光翻綺席應笑
披羊裘獨釣溪邊石

黃本中書齋為寫寄傲窻圖

庭樹綠交蔭時鳥語清綿春竹羅逕筍夏花敷沼蓮慨
然三季後契彼羲農前古井汲脩綆空齋絙素絃長歌
歸去來悟彼陶公賢終尋桃源崦息景窮幽玄

為徐有常画葉湖別墅

葉湖水淪漪松陵在其西望見吳門山波上翠睂低白
蘋晚風起寒煙遠樹齊水蕉籠筆格露柳罩金堤居貞
寧汲汲旅泊自栖栖屏處觀魚鳥風雨夜烏啼

煮石山房

汲澗煮白石雲栖南澗隈敲石發新火荆薪藉餘灰坐
候升降理靜觀寒燠媒遂忘石鼎沸乍疑山雨來丹成
同此術鶴化詎能猜我亦餐金液清淺笑蓬萊

九日過彥行用韻一首

蕩舟煙景晚舉杯當素秋黃花忽在眼白髮仍滿頭臨
流發悲悼援琴歌楚調罷席更淹留明月波間照何事
鹿皮翁逃名隱屠釣

題趙若巖龍山精舍

我生倦馳騖無機如漢陰重遊古蘭若對山開我襟風
流李謫仙賞靜諧夙心琅然哦新詩如聞大雅音回首
石林晚白雲花雨深

蕭閒館夜坐

隱几忽不寐竹露丁泠泠青燈淡斜月薄帷張寒廳躁
煩息中動希靜無外聆杳然玄虛際詎知有身形

雙蛾精舍新秋追和戎昱長安秋夕

秋暑晚差涼茗餘眠獨早清風振庭柯寒蛩吟露草晨

興面流水西望吳門道不知人事劇但見青山好

偶成

積雪不肯休蕭條使人愁哀吟四壁靜病卧百蟲秋開
門望原野江湖漭交流誰能載美酒為我散煩憂

送章鍊師并寄鄭有道

良覲忽云阻桐花今亦繁落日滿洲渚揚舠念孤鶩因
懷息機叟蘊真從灌園晨掃石上雲佇子接清言

冬日窓上水影

日池浮湛霞牖上縈迴敷腴三素雲照耀青蓮臺高
流輝自下含漪斂復開尸坐以默觀靜極自春回

雲泉為王光大賦

高齋面絕壁林密徑難尋風落松上雪零亂幽磴陰皓
潔映鶴氅清圓和瑤琴閒咏以自樂聊用忘華簪

懷寄強行之常州學官

君在西溪上年年楊柳春提壺坐柳下邀我見情真青
葉已垂帶白花還覆蘋別來今見柳思爾采芳芹

己卯正月十八日與申屠彥德遊虎丘得客字

余適偶入城本是山中客舟經二王宅弔古覽陳迹松陰如亭午嵐氣忽斂夕欲去仍徘徊題詩滿苔石

杜真人聽松軒

計籌白石頂聞有丹丘生和玉飲晨露褰林餐絳英止鶴眠松警螢火照書明為善得仙道翛然不近名

泊舟

泊舟嘉樹下開牖碧江潯慨然念黃落景憇惜清陰多

暇觀魚鳥容與一登臨
蛻迹塵喧久欲寡天機深

貞松白雪軒分韻

境靜塵慮清雨餘山光變
池館閔虛閒琴樽申縵縵
蔚哉春木榮憩我飛翮倦
石間有題字苔蝕已難辨

寄楊廉夫

吳松江水春汀洲多綠蘋
彈琴吹鐵篴中有古衣巾
我欲載美酒長歌東問津
漁舟狎鷗鳥花下訪秦人

寄李隱者

南洲新月色照見水中蘋便欲乘清影沿源訪隱淪君
住鈿山湖綠酒松花春夢披寒雪去疑是剡溪濱

寄韓介石

江上雨雲歇夕陽歌吹濛朱絃彈綠綺令我終韓憶魚
戲弱藻下鳥飛明鏡中夢乘清浦月直過雲溪東

贈友生

春林積雨晴江渚煙波綠谷鳥語綿蠻澗泉聲斷續蘿
逕無來踪空山聞伐木時援清琴坐還同白雲宿

龍門茶屋圖

龍門秋月影茶屋白雲泉不與世人賞
瑤草自年年上有天池水松風舞淪連
何當躡飛鳬去采池中蓮

尋友人不遇

洲渚多落英潏流尋遠山輕舟載美酒
搖蕩綠波間俯詠拾瑤草遐思隘塵寰
緣忽失遇悵望遂空還

次張仲舉韻

秧疇蒔已遍午饁休中林忽聞軺車至
攬衣欣慨深遂

尋脩竹下共憩西澗陰汲泉以煮茗退哉遺世心

池蓮詠

迴翔波間風的歷葉上露清池結素彩華月映微步雲
陰花房斂雨歇芳氣度欲去拾明璫踟躕惜遲暮

徐氏南園對雨

櫻桃花欲落風雨暮淒迷忽憶郊園日竹林通澗西弱
蔓滋野援蘭葉長芳畦念我當時友蒿萊沒舊蹊

與張貞居雲林堂宴集分韻得春字

青苔網庭除曠然無俗塵依微樵逕接曲密農圃鄰鳴禽忽變夏疎花尚駐春坐對盈樽酒欣從心所親

奉謝張天民先生

鳴雁將北歸裴回舊樓處江湖春水多欲去仍回顧稻梁豈予謀繒繳非所慮猶為氣機使暄冷逐來去寥寥天宇寬彼此同一寓風萍無定踪易散聊為聚君看網中魚在疚猶相煦

丙子歲十月八日夜泊閭門將還溪上有懷友仁

陸徵君

明發辭吳會移舟夜淹泊空宇重繁星微雲暝前郭沈
沈抱沖素悄悄傷離索歸掃松逕苔遲君踐幽約

雨中寄孟集

英英西山雲翳翳終日雨清池散圓文空林絕行屨野
性夙所賦好懷誰共語燒香對長松相與成賓主

次韻姑蘇錢塘懷古

二首

釀酒劔池水玉壺清若無揮盃送落月山鬼共歌呼松

間燈如漆白骨漫寒蕪

江山國破後弔古一經行輦路苔花碧御溝
菰葉生古跡今寧有新城江上橫

題王元用秋水軒

秋水如玉涵綠蒲玉壺美酒清若無佳人倚窓調錦瑟
丈君勸酒坐當壚昔年種柳遶漢南樹今搖落人何堪
惟有年年秋水至翠煙石黛漾晴嵐開軒清映臨秋水
斜日荷花淡相倚凌波微步穢生塵交甫凝情珮還委

餘不溪詞

開玄館在餘不溪濱距溪無百步上清王真人所立
溪流冬夏盈演玉光澄映與他水特異故為名焉庚
午歲春因市藥過浙江趨便道將歸梅里俯斯水而
悅之沂流閒詠鹽濯平津顧瞻壇宇近在東麓遂舍
舟造其下真人為出酒脯燕嘯巖洞竟日乃返悠悠
徂歲忽已十有七寒暑矣余既為農畝畝身依稼穡
復爾政繁奔走州里欲為昔遊其可得乎鍊師下騫

物表閒情夷朗周覽宇宙將還真館余因仿像疇昔
之所覩極道山之清婉追賦短章以餞斯別

餘不溪水綠生簫放舟演漾當青春舟隨鶴影忽行遠
洞口桃花飛接人雲松蔽虧煙蘿席儼在溪東之石壁
羽人垂衣坐鼓簧饋我晨餐芝菌香從茲更發洞庭渚
濯髮咸池臨故鄉

歲己酉八月十四日寓甫里之野人居劉君元暉
邀余酌酒快雪齋中對月理咏因賦長句

涼月紛紛疑積雪凝暉散彩白于銀此時獨酌開軒坐
便欲剡溪尋隱淪爾營茅齋名快雪我醉行吟踏秋月
河漢無聲風露寒心境泠然一高潔

送潭州魯總管

翩翩文鵷飛渡淮葦蕤五采下天階西疇昨夜雨初徧
田父謳歌有好懷湘潭山色隨輕轂談笑來為此州牧
隔岸桐林散綺霞三月洞庭春水綠

趙千里扇上寫山用鄭山人韻題

誰見解衣作盤礴卷懷雲煙歸掌握春雨冥冥江水波
竹間日暮衣裳薄零落王孫翰墨餘越王臺殿久荒蕪
要知人好画亦好愛比當年屋上烏

送徐君玉

閩江之水清漣漪隔江名園多荔枝閩中女兒天下白
越波飛槳逐鳬鷺權歌清綿洲渚濶蕩槳落日令人悲
蠻煙怪雨忽冥密蔣芽蒲葉相參差此中勝事不為少
徐郎遠遊牽我思

醉歌行次韻酬李徵君春日過草堂

昔聞杜陵之茅屋汀花冥冥汀樹綠舊題新詠荅年華
種木行椒繞山麓石牀丹竈青琅玕春渠流水夜潺湲
當年寶劍淪黃土空餘山月照波間今我不樂懷往古
短世紛紛誰比數花下欣逢李白來汀鳥溪童亦歌舞
酒酣長嘯五情熱軒冕何榮築巖說邈然抗節餓首陽
何異佯狂抱貞潔君歌已竟歌我詩賢愚榮悴百年期
少艾豈愛壁間画老疾俱來難命駕仰視翁忽浮雲馳

安得乘螭與雲化楊花縈夢滿晴天迸壑春雷驚醉眠
李侯神清色不動手敲茶雪落輕煙相逢為樂誠草草
竟欲攜君卧烟島城郭秋風白鶴飛海上餐霞不知老
至正十三年三月四日同章鍊師過張先生山齋
壁間見柯敬仲墨竹因懷其人其詩文書畫鑒
賞古跡皆自許為當代所少狂逸有高海岳之
風但目力稍恕耳今日乃可得耶

柯公鑑書奎章閣吟詩作畫亦不惡圖書寶玉尊鼎彝

文彩珊瑚光錯落自許才名今獨步身後遺名將誰託
蕭蕭烟雨一枝寒呼爾同遊如可作

贈顧定之

輕薄紛紛新少年論詩作賦如湧泉為雲為雨手翻覆
背面傾擠當面憐阿翁七十仍踰四與我同心生並世
高卧白雲餐絳霞草堂門對靈巖寺

贈陶得和製墨

麋膠萬杵搗玄霜螺製初成龍井莊悟得廷珪張遇法

古松烟細色蒼蒼
桐花烟出潘衡後
依舊井龍柳枝瘦
請看陶法妙非常
一點濃雲瓊楮透

送呂養浩之紹興

賀監宅前路荷花
今亦無空餘湖上
月照見水中蒲送
爾作官幽絕處錢
塘江頭飛柳絮聽
事臨堤滿夕嵐時
有沙鷗自來去

題張氏叢竹軒

高軒自虛曠幽竹
亦叢生苔石寒依
玉風泉夜炙笙治

冠輕可着醞酒綠因名好折青鸞尾仙壇掃月明

秋日贈張茂實

久客東海上秋風吹練裊放言愛壯叟笑癖如陸雲采
藥清晨出哦詩靜夜聞滄浪可濯足吾與爾為羣

為文舉画泖山圖因題

華亭西畔路來訪舊時踪月浸半江水蓮開九朶峰酒
杯時可把林叟或相從興盡冷然去雲濤起壑松

次韻酬彞齋見詒

荆溪丘壑遠暇日得躋攀野客時相過高人意自閒
敲門看脩竹卜宅近青山勝事今寧有幽吟一解顏

送僧

聞說四明道山川似若耶去依阿育塔還宿梵王家
野井封殘雪江船聚晚沙光公强健否持底作生涯

寄徐仲清

巖谷採靈藥蕭條栖遁情白雲簷下宿海鶴階前鳴
燕俎登春菌晨餐脯竹萌時憑五泄水好過蘭陵城

画竹贈王光大

荆溪王隱士相見每從容借地仍栽竹巢雲獨傍松青
苔盤石淨嘉樹綠陰重約我同栖遁高高第幾峰

題漁樵友卷

釣渚復樵山逃名宇宙間一篙春水淨半畝落花閒鷗
鳥時親狎松雲共往還厭聞塵世事緬邈不相關

題元朴上人壁

蕭條江上寺迢遞白雲橫坐待高僧久時聞落葉聲鵝

夷懷往事張翰有餘情獨櫂扁舟去門前潮未生

寄王叔明

能詩何水部愛石米南宮允矣英才最居然外祖風釣

絲烟霧外船影盡圖中他日千金積陶朱術偶同

外祖謂子昂也

悼項山清上人

幽曠山中樂飄飄物外踪梵餘閒憩石定起獨哦松花

落春衣靜雲垂澗戶重依依種蓮處林暝只聞鐘

高進道水竹居

我愛高隱士移居水竹邊
白雲行鏡裏翠雨落階前
獨坐數書席相過趁釣船
何當重來此為醉酒如川

賦雪蓬

手把玉麈尾身披素綺裘
梨花紫夜月柳絮入虛舟
不作饑鶯咏其如載酒遊
因懷剡溪興烟水暮悠悠

甫里

甫里林居靜江湖遠浸山
漁舟衝雨出巢鶴帶雲還
漉酒松肪滑數茵楮雪閒
春風一來過似泊武陵灣

荒村

踽踽荒村客悠悠遠遁情竹梧秋雨碧荷芰晚波明穴
鼠能人拱池鷺類鶴鳴蕭條阮遙集幾屐了餘生

寄虞子賢

天濶海漫漫崑山望眼寬桃源迷晉世松樹受秦官雨
蘚鹿迹遍霜梧鷺影寒封題數行字聊問竹平安

酬彝齋

秋氣入幽居堦前樹影疎筋骸渾懶慢服食轉清虛薄

晚魚潛渚新晴溜繞除茯苓期共煮悵望苦吟餘

聽雨

樓上看春雨玉笙悲遠天辛夷紅蘸水楊柳綠搖烟
冉冉侵書幌冥冥溼釣船新愁嫌點滴自不到鷗邊

題丘氏壁

我愛丘君宅蕭然隱者風石邊蒙細篠井上植高桐
墨沼鷺羣白雲窻藥竝紅咏歌當上已修禊樂融融

貽文舉

波光浮翠閣苔色上春衣楊柳鶯啼邃櫻桃鳥啄稀
榮名非所慕登覽意忘歸泝水宜修禊重來坐釣磯

賦得機徵君荆南精舍圖

結廬溪水南勝處足幽探夏果落山雨春衣染夕嵐
石敲招鶴磴門俯射蛟潭日日縈歸夢蕭條雪滿簷

寄王叔明

幾夢山陰王右軍筆精墨妙最能文每將竹影摹秋月
更愛山居寫白雲秘笈封題饒古跡雅懷蕭散逸人羣

今年七夕聞多事
曝書繙書到夕曛

八月三日與劉道益連牀夜話風雨淒然五日開

霽道益賦詩見貽次韻

扁舟小泊菰蒲雨
玄論卻消身意塵
空寂室中無侍者
蕭條雲外不羈人
酒杯畏病寧復舉
燈火新涼差可親
嫋嫋秋風振庭樹
綠波芳草似初春

春日送別余秀才

翼翼高帆開遠天
綠波芳草隨煙綿
春林風雨集憂思

茅屋琴書移晷眠
文采由來庾信少
草聖近誇張旭顛
百年聚散如落葉
行客居人誰可憐

春日試筆

喜看新酒似鶯黃
已有春風拂草堂
二月江南初破柳
扁舟晚下獨鳴榔
苔生不碍山人屐
花發應連野老牆
美酒已拚千日醉
莫將時事攪愁腸

用王叔明韻題畫

王郎筆力追前輩
海岳新圖入卧遊
獨鶴眠松猶警露

孤猿挂樹忽驚秋
陶潛宅畔五株柳
范蠡湖中一葉舟
同煮茯苓期歲暮
殘生此外更何求

居竹軒

翠竹如雲江水春
結茅依竹住江濱
階前迸筍從侵迺
雨後垂陰欲覆鄰
映葉黃鸝還自語
傍人白鶴自能馴
遙知靜者忘聲色
滿屋清風未覺貧

送杭州謝總管

南省迢遙阻北京
張公開府任豪英
守臣視爵等侯伯

僕射親民如父兄錢廟有碑祠夜雨岳墳無樹著秋聲
好將飲食濡饑渴何待三年報政成

寄熙本明

白首遙知得道餘不聞詩思近何如高齋夜雪同誰話
古木寒山獨自居夢裏只尋行去路愁時聊讀寄來書
夕陽溪上多飛鳥若箇能看影是虛

送徐子素

山館留君才一月梅花無數倚霜晴垂簾幽閣團雲影

貯火茶爐作雨聲
深竹每容馴鹿卧
青山時與道人行
歸舟載得梁溪雪
惆悵鄰鷄月四更

三月一日自松陵過華亭

竹西鶯語太丁寧
斜日山光澹翠屏
春與繁花俱欲謝
人如中酒不能醒
鷗明野水孤帆影
鵲沒長天遠樹青
舟楫何堪更留滯
待窮幽賞過華亭

顧仲贄來聞徐生病差

室裏維摩病已瘳
竹爐藥鼎雨聲秋
一畦杞菊為供具

滿壁江山入卧遊
舟外鷗波情浩蕩
窓間蝶夢思綢繆
虎頭癡絕從談詭
煮茗聊為半日留

西野對雨有懷明本諸公

怪雨顛風裂芰荷
鷗飛雁亂水驚波
便須掃地焚香坐
豈有高人載酒過
笠澤至今能養鴨
山陰何處更籠鵝
重陰忽霽猶斜日
惆悵思君奈老何

奉和虞學士寄張外史

華陽上館誰曾到
知有高人避世深
當戶春雲團紫蓋

洗空花雨散青林丹臺篆迹龍蛇動經閣松聲鸞鶴吟
念子離居消息遠幾將書札寄遙岑

杭人有傳余死者貞居聞之愴然因賦此以寄

果園橘熟誰分餉茅屋詩成嬾寄將衰謝皆傳余已死
迂疎真與世相忘夜分風雨鷄鳴急天濶江湖雁影長
寥落百年能幾面論文猶及重銜觴

次張伯雨潘子素酬唱韻

團團桂樹覆巖阿茅屋歸來雪一窩高卧丘園奇氣在

倦遊江海故人多
楚山白雁遵寒渚
練水長魚出素波
去去南州書問少
寂寥誰和紫芝歌

寄張德常

身世蕭蕭一羽輕
白螺盃裏酌滄瀛
逍遙自足忘鵬鷃
漫浪何須記姓名
石鼎煮雲聽澗雨
玉笙吹月和松聲
憑君為問張公子
曾到良常夢亦清

上巳日感懷

石梁破屋路欹斜
僻似華陽道士家
漠漠春雲飛別鶴

潺潺夜雨雜鳴蛙
閒看稚子蠅書葉
時有鄰翁汲井花
日暮傷心江水綠
共舟人已躡飛霞

三月廿二日雨懷荆溪勝遊寄原道

我昔繫舟尋杜牧
荆溪流水落川光
春茶已放仙人掌
露蘚渾侵玉女牀
酒闌更踏花間月
舞罷猶彈陌上桑
此日狂遊忘旦暮
十年回首意茫茫

謝伯理東還訪之不一遇

謝朓宅前山黛濃
山雲飛墮墨池中
攜家又作它鄉夢

歸櫂還隨落葉風，鶴入暝烟愁浩渺。
鷗浮遠水思清空，尋君不遇成惆悵。
江草青青岸蓼紅。

東林隱所寄陸徵士

侵扉桃李晝陰陰，耕鑿居人有遠心。
一夜池塘春草綠，孤村風雨落花深。
不嗔野老羣爭席，時有遊魚出聽琴。
白髮多情陸徵士，松間石上續幽吟。

送僧遊天台用張外史韻

四明山水名天下，師去那知客路遙。
雪霽驚鷹騰宿莽。

月明寒鵲集疎條坐尋雲頂千峰石歸趲江頭八月潮
說與住山光老子送賓也合過溪橋

過許生茅屋看竹

舟過山西已夕曛許生茅屋遠人羣鑿池數尺通野水
開牖一規留白雲煮藥烟輕衝竈出碓茶聲遠隔溪聞
可憐亦有王猷興堦下新移見此君

失鶴

啄粟巢松泰華峰直將天地作樊籠不聞丁令歸華表

應馭王喬入太空行迹縱橫苔石上寒棲依舊竹林中
清齋我亦厭腥腐長歎思乘萬里風

中秋脾胃疾不飲有感

經旬卧病掩山扉巖穴潛神似伏龜身世浮雲度流水
生涯煮豆爨枯萁紅螺捲碧應無分白髮悲秋不自支
莫負尊前今夜月長吟桂影一伸眉

北里

舍北舍南來往少自無人覓野夫家鳩鳴桑上還催種

人語烟中始焙茶池水雲籠芳草氣井牀露淨碧桐花
練衣挂石生幽夢睡起行吟到日斜

山園

春水鳬鷺野外堂山園細落橘花香栖身世晝盈篋
漠漠風烟酒一觴豈為任真無禮法也須從俗著冠裳
不營產業人應笑竹本桃栽已就行

林下遣興

眼見藤梢已過牆手拈書卷復堆牀閒臨水檻觀魚鳥

欲出柴門畏虎狼
冠製不嫌龜殼小
衣裾新剪鶴翎長
從來任拙唯疎懶
一月秋陰不下堂

二月十日玄文館聽雨

卧聽夜雨鳴高屋
忽憶陂塘春水生
何意遠林饑獨鶴
若為幽谷滯流鶯
成叢枸杞還堪采
滿樹櫻桃空復情
二月江頭風浪急
無機鷗鳥亦頻驚

雪後過陳子貞隱居

陶公卜宅南村裏
快雪初晴思一遊
樹辨微茫來獨鶴

櫓搖敲側散輕鷗墨池繞溜春永滿塵榻繙書夕照收
相見惘然如有失掉頭吟咏出林丘

贈別益以道書記

一笑相逢豈有期因懷西崦話移時李公祠畔空餘月
陸子泉頭舊有詩旅思悽悽非中酒人情落落似殘棋
雲濤眼底三生夢鷗影秋汀又遠離

寄張貞居

不但入城踪跡少南鄰野老見猶稀狂歌衰鳳聊自慰

舊學屠龍良已非
蒼蘚渾封麋鹿逕
白雲新補薜蘿衣
羊君筆札誰能繼
欲讀靈文一扣扉

題孫氏雪林小隱圖

天地飄搖一短蓬
小窓虛白地爐紅
翛然忽起梨雲夢
不定仍因柳絮風
鶴影離離簷上下
鹿迹散漫屋西東
杜門我自無干請
閒寫芭蕉入畫中

思歸

久客懷歸思惘然
松間茅屋女蘿牽
三杯桃李春風酒

一榻荻蒲夜雨船
鴻迹偶曾留
雪渚鶴情原只在
芝田
他鄉未若還家樂
綠樹年年叫杜鵑

夜作古木怪石因題

夜遊西園渚
初月光炯炯
徙倚巖石下
愛此林中影

題秋亭曉色圖

園林夏雨歇
旭日照蒼苔
誰見竹亭裏
孤坐興悠哉

題良常草堂圖

結屋正臨流水
開門巧對長松
為待神芝三秀
移居華

蓋西峯

田舍

山鳥下窺窓
春風時拂蓬蒿
避世何須鄭
谷作書已絕
山濤

雲溪佳處

誰覓雲溪佳處
渚花汀竹迷藏
去鶴原邊倚杖
浮鷗波上鳴榔

謾題

田父聊同爾汝狂夫從問如何昔日揮金豪俠今朝苦
行頭陀

水仙花

曉夢盈盈湘水春翠虬白鳳照江濱香魂莫逐冷風散
擬學黃初賦洛神

追和戎昱寄鍊師

雲霧軒窗倚半空少霞銘處識新宮遙看一片秋山色
鶴影徘徊明月中

雙井院前小立

山色微茫好放船
秋蕖野水夕陽邊
西風更洒菰蒲雨
羨爾沙鷗自在眠

次韻曹都水

夜寒館裏挑燈宿
山罽重敷六尺牀
隱几蕭條聽塢雨
竹林煙幕煮茶香

次韻春雨

黯黯春雲映戶輕
綠蕪斜日忽開晴
依微野徑泉侵盡

風落桐花遠思生

絕句

醉喚吳姬舞蹈筵
風欄花陣亦回旋
愁生細雨寒煙外
詩在青蘋白鳥邊

別潘先輩

君來煙草正淒迷
君去溪頭柳葉齊
挂席中流竟東上
莫重回首向荆溪

寄友

二月江水清接天楊柳隔江搖綠煙一夜愁心似春雪
隨風舞影落君前

竹枝詞

春愁如雪不能消又見清明賣柳條傷心玉照堂前月
空照錢塘夜夜潮

題畫

樓閣參差霞綺開峰巒重複水縈迴赤欄橋外垂楊下
步月吹笙向此來

六月五日偶成

坐看青苔欲上衣一池春水靄餘暉
荒村盡日無車馬時有殘雲伴鶴歸

二月十五日雨作

風軒紅杏散餘霞堤草青青桃欲花
寒食清明看又近滿川煙雨亂鳴蛙

題畫贈崔子文

性癖居幽每起遲一來溪口意淒迷
林亭曉色蒼茫裏

目送風帆過水西

贈曹德昭

谷口桐林落絳霞
仙帆初泊野人家
蕭閒館裏青苔合
看到階前芍藥花

客舍詠牽牛花

小盤承露淨鉛華
玉顆依稀染碧霞
弱質幽姿娛我老
傍人籬落蔓秋花

清明後題

野棠花落又清明楊柳青青人耦耕春物闌珊成底事
半江疎雨暮潮平

追和蘇文忠墨蹟卷中詩韻

奎章閣下掌絲綸清淺蓬萊又幾春三十六宮秋寂寂
金盤冷露泣仙人

聞竹枝歌因效其聲

鈿山湖影接松江橘葉青青柿葉黃要寫新詩寄音信
西風斷雁不成行

看花士女圖

畫圖常識春風面雲霧衣裳楚楚裁為問人間春幾許
石欄西畔牡丹開

剖瓜士女圖

月彎分破翠團團六月人間風露寒誰覓東陵故侯去
但知華屋薦金盤

煙雨

煙雨空濛遠樹齊人家樹底自成蹊只應二月吳松尾

渚際維舟聽竹雞

蘇臺懷古

望中煙草古長洲不見當年麋鹿游
滿目越來溪上水流將春夢過杭州

宋元詩會卷九十